

## জুমুআর খুতবার সারাংশ

২৩শে মার্চের প্রেক্ষাপটে আহ্মদীয়া জামাত প্রতিষ্ঠার ইতিবৃত্ত এবং পাকিস্তান প্রতিষ্ঠার ক্ষেত্রে জামাতের অনন্য অবদান

সৈয়দনা হযরত আমীরুল মু'মিনীন খলীফাতুল মসীহ আল্ খামেস (আইঃ)  
বাইতুল ফুতুহ্ মসজিদ, লন্ডন, ইউকে  
২০শে মার্চ, ২০০৯ইং

أشهد أن لا إله إلا الله وحده لا شريك له، وأشهد أن محمداً عبده ورسوله. أما بعد فأعوذ بالله من الشيطان الرجيم\*  
بِسْمِ اللَّهِ الرَّحْمَنِ الرَّحِيمِ \* الْحَمْدُ لِلَّهِ رَبِّ الْعَالَمِينَ \* الرَّحْمَنُ الرَّحِيمِ \* مَالِكِ يَوْمِ الدِّينِ \* إِيَّاكَ نَعْبُدُ وَإِيَّاكَ نَسْتَعِينُ \* أَهْدِنَا  
الصِّرَاطَ الْمُسْتَقِيمَ \* صِرَاطَ الَّذِينَ أَنْعَمْتَ عَلَيْهِمْ غَيْرِ الْمَغْضُوبِ عَلَيْهِمْ وَلَا الضَّالِّينَ (آمين)

উচ্চারণঃ আশহাদু আন্ লা ইলাহা ইল্লাল্লাহু ওয়াহ্দাহু লা শারীকালাহু ওয়া আশহাদু আন্না মুহাম্মাদান আবদুহু ওয়া রাসূলুহু আন্না বা'দু ফাউযু বিল্লাহি মিনাশ্ শাইতানির রাজীম। বিসমিল্লাহির রহমানির রাহীম। আলহামদু লিল্লাহি রব্বিল আলামীন আর্ রহমানির রাহীম মালিকি ইয়াওমিদ্দিন ইয়্যাকা না'বুদু ওয়া ইয়্যাকা নাসতাঈন ইহদিনাসসিরা তাল মুস্তাকীম সিরাতাল্লাযীনা আনআমতা আলাইহীম গাইরিল মাগযুবে আলাইহীম ওয়ালায্ যোয়াল্লীন। (আমীন)

হযর আনোয়ার (আই.) বলেন, আমরা সবাই অবগত যে, আজ থেকে একশত বিশ বছর পূর্বে এই মাস, অর্থাৎ মার্চের ২৩শে তারিখে পবিত্র কুর'আনের সেই মহান ভবিষ্যদ্বাণী পূর্ণ হয়েছে, যা আল্লাহ তা'লা সুসংবাদ স্বরূপ মহানবী (সা.)-কে প্রদান করেছিলেন। মুসলিম উম্মাহ্ এক হাজার বছর ধরে ক্রমশ অন্ধকারে নিমজ্জিত হয় এবং অধিকাংশ মুসলমানের ভেতর ইসলাম ধর্মের নাম মাত্র অবশিষ্ট থাকার প্রেক্ষাপটে আল্লাহ তা'লা সেই চন্দ্রের আলোকিত হওয়ার সংবাদ প্রদান করেন। যাঁর জন্য সিরাজে মুনীর (প্রদীপ্ত সূর্য) থেকে আলো বা জ্যোতি লাভ করা অবধারিত ছিল। যাঁর সম্পর্কে মহানবী (সা.) বলেছিলেন, কিয়ামত পর্যন্ত তিনি আলোর বিচ্ছুরণ ঘটিয়ে যাবেন আর তাঁর সিলসিলাহ্ বা জামাত স্থায়ী হবে এবং তাঁর আঁকা ও মনিব হযরত মুহাম্মদ মুস্তফা (সা.) কর্তৃক আনীত শরিয়তের সৌন্দর্য ও দীপ্তির মাধ্যমে তরবীয়ত প্রাপ্তরাও সর্বদা বিশ্ববাসীর হৃদয়কে সৌন্দর্যমণ্ডিত ও আলোকিত করে যাবেন। অতএব মহানবী (সা.)-এর এই মহান পুত্রের প্রতিষ্ঠিত জামাতের একটি যুগের সূচনা হয় ১৮৮৯ সনের ২৩শে মার্চ, যখন আল্লাহ তা'লা তাঁর প্রতি ইলহাম করে বলেন:

إِذْ أَعْرَضْتُمْ فَتَوَكَّلْ عَلَى اللَّهِ  
وَاصْنَعِ الْفُلْكَ بِأَعْيُنِنَا وَوَحْيِنَا  
إِنَّ الَّذِينَ يُبَايِعُونَكَ إِتْمَانًا يَبَايِعُونَ اللَّهَ يَدُ اللَّهِ فَوْقَ أَيْدِيهِمْ

তিনি ইযালায়ে আওহাম গ্রন্থে এর অনুবাদ করেছেন,

‘তুমি যেহেতু এই সেবার সংকল্প করেছ তাই খোদা তা'লার উপর নির্ভর কর এবং তুমি আমাদের তত্ত্বাবধানে আমাদের ওহী অনুযায়ী নৌকা তৈরী কর। নিশ্চয় যারা তোমার হাতে বয়'আত করে বস্ত্ত তারা আল্লাহ্র হাতে বয়'আত করে। আল্লাহ্র হাত তাদের হাতের উপর রয়েছে।’

অন্যত্র তিনি (আ.) বলেন,

‘তিনি এই জামাত প্রতিষ্ঠার সময় আমাকে বলেছেন, পৃথিবীতে ভ্রষ্টতার প্লাবন বিরাজ করছে। তুমি এই প্লাবনের সময় নৌকা তৈরি কর। যে ব্যক্তি এই নৌকায় আরোহণ করবে সে নিমজ্জিত হওয়া থেকে রক্ষা পাবে। আর যে অস্বীকার করবে সে মৃত্যুর মুখোমুখি হবে।’

যা-ই হোক, তিনি ঐশী নির্দেশে ১৮৮৯ সনের ২৩শে মার্চ বয়’আত গ্রহণ আরম্ভ করেন। সেদিন শত শত সৌভাগ্যবান এই নৌকায় আরোহণ করেন। আর এই সংখ্যা ক্রমশ বৃদ্ধি পেয়ে তাঁর জীবদ্দশাতেই কয়েক লক্ষে উপনীত হয়েছে। সেসব বয়’আত গ্রহণকারীরাও বয়’আতের পর নিজ দায়িত্ব অনুধাবন করেছেন। আল্লাহ তা’লাও তাদের উপর স্বীয় স্নেহের হাত রেখেছেন। ফলে তাঁরা ক্রমশ আধ্যাত্মিকতার উন্নত মার্গে আরোহণ করতে থাকেন। তাদের উপরও বিরোধিতার ভয়াবহ তুফান আসে। আপন-পর সবার পক্ষ থেকে শত্রুতার সম্মুখীন হতে হয়। এমনকি তাঁর হাতে বয়’আত করার অপরাধে অনেককে শহীদও করা হয়েছে। তাদের ভেতর সবচেয়ে মহান হলেন হযরত সাহেবজাদা সৈয়দ আব্দুল লতিফ শহীদ (রা.) যাঁকে অত্যন্ত নির্দয়ভাবে শহীদ করা হয়েছে। এ সকল মৌলভীদের ফতওয়া মোতাবেক বাদশাহর নির্দেশে তাঁকে প্রথমে মাটিতে পুতে তারপর অত্যন্ত নির্দয়ভাবে পাথর মেরে শহীদ করা হয়। এই সব ঘটনা আমাদেরকে প্রাথমিক যুগের নির্যাতনের সেসব ঘটনা স্মরণ করায় যা মহানবী (সা.)-এর সাহাবীদের উপর করা হয়েছিল। কিন্তু সকল প্রকার যুলুম-নির্যাতন ও বিরোধিতা আর সরকারকে তাঁর বিরুদ্ধে খেপানোর ষড়যন্ত্র সত্ত্বেও আল্লাহ তা’লার এই জামাত ক্রমশ উন্নতি করতে থাকে। পরিশেষে ১৯০৮ সনের ২৬শে মে তিনি ঐশী সিদ্ধান্ত মোতাবেক তাঁর উপর অর্পিত দায়িত্ব সম্পাদন করে স্বীয় প্রভুর নিকট প্রত্যাবর্তন করেন। এরপর খোদা যেভাবে তাঁকে আশ্বাসবাণী শুনিয়েছিলেন, তাঁর জামাতের দ্বিতীয় ধাপ কুদরতে সানীয়ার মাধ্যমে আরম্ভ হবে। সেই সম্পর্কে স্বয়ং হযরত মসীহ মওউদ (আ.) বলেন,

‘মোটকথা, আল্লাহ তা’লা দু’ প্রকার কুদরত প্রকাশ করেন। প্রথমত, নবীদের মাধ্যমে আপন শক্তির এক হস্ত প্রদর্শন করেন। দ্বিতীয়ত, অপর হস্ত এমন সময় প্রদর্শন করেন, যখন নবীর মৃত্যুর পর বিপদাবলী উপস্থিত হয় এবং শত্রু শক্তি লাভ করে মনে করে, এখন (নবীর) কার্য ব্যর্থ হয়ে গেছে; তখন তাদের এই প্রত্যয়ও জন্মে, এখন জামাত (ধরাপৃষ্ঠ হতে) বিলুপ্ত হয়ে যাবে; এমনকি জামাতের লোকজনও উৎকণ্ঠিত হয়ে পড়েন, তাদের কটিদেশ ভেঙ্গে পড়ে এবং কোনো কোনো দুর্ভাগা মুরতাদ হয়ে যায়। তখন খোদা তা’লা দ্বিতীয়বার আপন মহাকুদরত প্রকাশ করে পতনোন্মুখ জামাতকে রক্ষা করেন। সুতরাং যারা শেষ পর্যন্ত ধৈর্য ধারণ করেন, তারা খোদা তা’লার এই মোজেযা প্রত্যক্ষ করেন।’ (আল্ ওসীয়াত, পৃ: ১৪, দ্বিতীয় সংস্করণ)

হযরত বলেন, যেভাবে তিনি (আ.) বলেছিলেন, অনেক দুর্ভাগা সন্দেহে নিপতিত হয়েছিল, এবং স্বীয় আমিত্বের বেড়াজালে আবদ্ধ হয়ে পড়ে। হযরত খলীফাতুল মসীহ আউয়াল (রা.) যাদেরকে অত্যন্ত প্রাঞ্জল ভাষায় বুঝিয়ে-শুনিয়ে সংশোধনের চেষ্টা করেছিলেন। কিন্তু তাদের দুর্ভাগ্য! দ্বিতীয় খিলাফতের নির্বাচনের সময় তাদের মধ্য হতে কতক মুরতাদও হয়ে যায়। একথা বুঝার চেষ্টা করেনি, পতনোন্মুখ জামাতকে আল্লাহ তা’লা

عِدُّ اللَّهُ فَوقَ أَيْدِيهِمْ এর দৃশ্য দেখিয়ে রক্ষা করেন। কাণ্ডজ্ঞান থাকা সত্ত্বেও তারা একথা চিন্তা করে নি যে, নৌকায় আরোহণ করে তারাই নিমগ্ন হওয়া থেকে রক্ষা পাবে যারা দ্বিতীয় কুদরতের সাথে যুক্ত থাকবে। কোনো আঞ্জুমান নয় বরং সেই দ্বিতীয় কুদরত হচ্ছে খিলাফত। অতএব আজও আমরাই সৌভাগ্যবান যারা খিলাফতের সাথে যুক্ত থাকার ফলে হযরত মসীহ মওউদ (আ.) নির্মিত এই নৌকায় আরোহণ করেছি এবং নিমজ্জিত হবার হাত থেকে রক্ষা পাচ্ছি। আমাদের উপর আল্লাহ তা’লার হাত রয়েছে। পৃথিবী ধ্বংসের অতল গহ্বরে পতিত হচ্ছে। আর আহমদীরা স্বীয় মহাশক্তিশালী খোদার কৃপার দৃশ্য অবলোকন করছে। ১৯০৮ থেকে আরম্ভ করে আজ পর্যন্ত শত্রুরা নিত্যনতুনভাবে জামাতকে ধ্বংস করার চেষ্টা করছে কিন্তু আল্লাহ তা’লা সর্বদা

বড় বড় বিপদাবলীর মন্দ পরিণতি এবং শত্রুর সম্মিলিত আক্রমণ হতে জামাতকে নিরাপদ রাখছেন। আল্লাহ তা'লার প্রতিশ্রুতি মোতাবেক যতবেশি জামাত বিশ্বে প্রসার লাভ করছে হিংসা এবং বিরোধিতার আগুনও ততো দ্রুত ছড়িয়ে পড়ছে। বিরোধিতা বাড়ছে এবং যেখানে যেখানে নামধারী, স্বার্থপর উলামাদের ক্ষমতা রয়েছে, তারা আহ্মদীদের উপর খোদার নাম নিয়ে কৃত সেসব যুলুম-নির্যাতন থেকে বিরত হচ্ছে না। কিন্তু প্রত্যেক বিরোধিতা আল্লাহ তা'লার অপার কৃপায় প্রত্যেক আহ্মদীর ঈমান বৃদ্ধির কারণ হয়। কেননা আল্লাহ তা'লা পূর্বেই বলে রেখেছেন, মু'মিনদেরকে খোদা তা'লার পথে কষ্ট সহিতে হবে।

হযরত মসীহ মওউদ (আ.) বলেন,

‘পবিত্র কুরআন থেকে সুস্পষ্টভাবে জানা যায় যে, ঈমানের পূর্ণতার জন্য বিপদাপদ আসা আবশ্যিক। যেভাবে বলা হয়েছে,

أَحْسِبِ النَّاسَ أَنْ يُؤْتِرُكَوَا أَنْ يَقُولُوا آمَنَّا وَهُمْ لَا يُفْتَنُونَ

অর্থাৎ ‘লোকেরা কি এটি মনে করে যে, আমরা ঈমান এনেছি একথা বলার কারণে তাদেরকে অব্যাহতি দেয়া হবে। এবং তাদেরকে পরীক্ষা করা হবে না।’ (সূরা আল্ আনকাবুত: ৩)

মোটকথা পরীক্ষা আবশ্যিক। যে এই জামাতভুক্ত হয় সে পরীক্ষা এড়াতে পারে না। আমাদের এমন অনেক বন্ধু আছেন, যাদের পিতা একদিকে আর তারা অন্য দিকে।’

অন্যত্র তিনি (আ.) বলেন,

‘যখন চরম পরীক্ষা আসে এবং মানুষ খোদার জন্য ধৈর্য ধারণ করে তখন সেই পরীক্ষা ফিরিশ্তার সাথে মিলিত করে দেয়। নবীদের উপর পরীক্ষা আসে বলেই তাদেরকে খোদার সাথে মিলিত করা হয়। পরীক্ষা ছাড়া উন্নতি অসম্ভব।’

অতএব এগুলো ঈমানে দৃঢ়তা লাভের জন্য সেসব নসীহত বা উপদেশ যা আল্লাহ তা'লার ফয়লে আহ্মদীরা আজও অবলম্বন করে আছে। প্রত্যেক আহ্মদী এটি খুব ভালোভাবে অবহিত আছে যে, বিরোধিতা আমাদের উন্নতির জন্য সার স্বরূপ।

হযরত বলেন, গত খুতবায় আমি বুলগেরিয়ার নবাগত আহ্মদীদের উল্লেখ করেছিলাম। এদের মধ্য হতে কতক নবাগত আর কতক কয়েক বছর পূর্বে আহ্মদী হয়েছেন। তাদেরকে সেখানকার মুফতি, যার রাষ্ট্রীয় কার্যক্রমে গুরুত্বপূর্ণ ভূমিকা রয়েছে, তার নির্দেশে পুলিশ আহ্মদীদের গ্রেফতার করে এবং ধরে থানায় নিয়ে যায়। তাদেরকে যখন আমি সালাম প্রেরণ করি এবং কেমন আছে ইত্যাদি জিজ্ঞেস করি; মুরব্বি সাহেব বলেন, আমি ব্যক্তিগতভাবে প্রত্যেকের সাথে যোগাযোগ করি এবং যখন পয়গাম পৌঁছাই তখন প্রত্যেকের উত্তর এটিই ছিল, আল্লাহ তা'লার কৃপায় আমরা ঈমানের উপর দৃঢ়ভাবে প্রতিষ্ঠিত, এসব দুঃখ-যাতনা কিছুই নয়। আবার অনেকে আবেগাপ্লুত হয়ে কাঁদতে আরম্ভ করে আর আমার জন্য পয়গাম পাঠায়, আপনি চিন্তিত হবেন না; আমরা জামাতের খাতিরে সব ধরনের দুঃখ-কষ্ট সহ্য করবো, ইনশাআল্লাহ। আপনি আমাদের জন্য কেবল দোয়া করতে থাকুন। মানুষ বলে, হযরত মসীহ মওউদ (আ.) কী বিপ্লব আনয়ন করেছেন? এটি যদি বিপ্লব না হয় তাহলে কী?

অনুরূপভাবে বর্তমানে ভারতের নবাগত জামাতের উপরও অনেক যুলুম-নির্যাতন চালানো হচ্ছে। আর যথারীতি সেখানেও নামধারী মোল্লারাই এই যুলুম চালাচ্ছে এবং মোল্লাদের উসকানিতে সেখানকার মুসলমানরা করছে। সরকার এজন্য কোনো কার্যকরী পদক্ষেপ নিচ্ছে না, যেহেতু অচিরেই সেখানে নির্বাচন হবে আর মুসলমানদের ভোট তাদের প্রয়োজন, কেননা আহ্মদীদের সেখানে তেমন কোনো শক্তি নেই। কিন্তু এসব নির্যাতনকারী এবং এসব যুলুম-নির্যাতন দেখেও যারা না দেখার ভান করছে তাদের স্মরণ রাখা কর্তব্য, জামাতে আহ্মদীয়ার

কাছে পার্থিব কোনো শক্তি নেই ঠিকই কিন্তু খোদা তা'লা জামাতে আহ্মদীয়ার সাথে আছেন। তিনি আমাদের মালিক; যখন তাঁর সাহায্য আসে তখন সবকিছু খড়-কুটোর মতো উড়ে যায়। যখন তাঁর তকদীর কার্যকর হয় তখন কোনো কিছু তাঁর সম্মুখে দাঁড়াতে পারে না। অতএব ভারতের আহ্মদীরাও ধৈর্য এবং বীরত্ব প্রদর্শন করুন। বিশেষভাবে দোয়ার প্রতি জোর দিন। পূর্বের তুলনায় আপন প্রভূর সাথে সম্পর্ক অধিক বৃদ্ধি করুন। অনুরূপভাবে আজকাল পাকিস্তানেও আহ্মদীয়াতের চরম বিরোধিতা হচ্ছে। সরকার এবং মোল্লাদের কর্মকাণ্ড দেখে বিস্মিত হতে হয়।

এরপর হুয়ুর বলেন, আজ পাকিস্তানের স্বত্বাধিকারী হওয়ার দাবীদার এসব মৌলভীরা বলে, ইসলামের এই দুর্গে কাদিয়ানীরা স্বীয় বিশ্বাস নিয়ে বাস করবে তা আমরা সহ্য করতে পারি না। তাদের জেনে রাখা দরকার, পাকিস্তান প্রতিষ্ঠার জন্য আহ্মদীরা যে সংগ্রাম করেছে তা সকল ভদ্র ও সজ্জন অ-আহ্মদীরাও স্বীকার করেন। যখন এসব চেষ্টা-প্রচেষ্টা চলছিল তখন তোমরা যারা আজ পাকিস্তানের বড় শুভাকাঙ্ক্ষী সেজে বসেছ আর মালিক হবার চেষ্টা করছ, তোমরা পাকিস্তান প্রতিষ্ঠার ভাবধারার বিরোধী ছিলে। মুসলমানদের অধিকার প্রতিষ্ঠার লক্ষ্যে জামাতে আহ্মদীয়া কীরূপ চেষ্টা করেছে তা সম্পর্কে তাদেরই কতকের বক্তব্য তুলে ধরছি। কেননা ২৩শে মার্চ পাকিস্তান দিবসও পালন করা হয়। ঘটনাক্রমে এ বিষয়টিও সামনে এসেছে। ভদ্রমানুষ, যারা সঠিক জ্ঞান রাখেন না তাদের অবগত করার উদ্দেশ্যে আবার মোল্লাদের খপ্পরে পড়ার কারণে পাকিস্তানেরও সঠিক ইতিহাস যারা জানে না, তাদের জ্ঞাতার্থে কতক বুদ্ধিজীবির লেখা থেকে তুলে ধরছি। যাতে তারা জানতে পারে যে, ভারতবর্ষের মুসলমানদের জন্য এবং পাকিস্তানের জন্য আহ্মদীরা কী করেছে।

একজন প্রখ্যাত সাহিত্যিক ও সাংবাদিক মওলানা মোহাম্মদ আলী জওহর সাহেব নিজ পত্রিকা 'হামদর্দ' এর ২৬শে সেপ্টেম্বর ১৯২৭-এর সংখ্যায় লিখেছেন:

‘জনাব মির্থা বশীর উদ্দিন মাহমুদ আহমদ এবং তাঁর এই সুশৃঙ্খল জামাতের কথা যদি এই ছত্রে উল্লেখ না করি তাহলে অকৃতজ্ঞতা হবে। যারা বিশ্বাসগত পার্থক্যের উর্ধ্ব থেকে সমস্ত মনোযোগ মুসলমানদের কল্যাণে নিবেদিত করেছেন। ... সেসময় দূরে নয় যখন ইসলামের এই সুশৃঙ্খল ফিরকার কর্মধারা সাধারণভাবে মুসলমানদের সংখ্যাগরিষ্ঠ শ্রেণীর জন্য আর বিশেষভাবে সে সকল ব্যক্তিবর্গের জন্য আলোকবর্তিকা প্রমাণিত হবে। যারা নিরাপদ স্থানে বসে বাহ্যত গলা ফাটিয়ে ইসলাম সেবার কথা বলে কিন্তু অভ্যন্তরীণভাবে তাদের দাবী মূল্যহীন।’

(‘হামদর্দ’ পত্রিকা, ২৬শে সেপ্টেম্বর ১৯২৭; ‘তা’মীরে তরক্বী পাকিস্তান এবং জামাতে আহ্মদীয়া’, পৃ: ৮)

পাকিস্তান প্রতিষ্ঠার ক্ষেত্রে সবাই জানে যে, কায়েদে আযমই আসল ভূমিকা পালন করেছেন। কিন্তু এমন একটি সময় আসে যখন তিনি নিরাশ হয়ে ভারত ছেড়ে ইংল্যান্ড চলে আসেন। তিনি স্বয়ং লিখেছেন,

‘আমার এমন মনে হচ্ছিল যে, আমি ভারতের কোনো সাহায্য করতে পারবো না। হিন্দুদের চিন্তাধারায়ও কোনো ইতিবাচক পরিবর্তন আনতে পারবো না আর মুসলমানদের চোখ খোলাও সম্ভব হবে না। অবশেষে আমি লন্ডনে বসবাস করাই মনস্থির করি।’

(‘কায়েদ এ আযম আওর উনকা আহদ’- রঈস আহমদ যাক্বরী’র, পৃ: ১৯২; ‘তা’মীরে তরক্বী পাকিস্তান এবং জামাতে আহ্মদীয়া’, পৃ: ৯)

হুয়ুর বলেন, এহেন পরিস্থিতিতে মুসলিম লীগের মুসলমানরা চরম ধাক্কা খায়। কিন্তু সবচেয়ে বড় শুভাকাঙ্ক্ষী ছিল জামাতে আহ্মদীয়া এবং হযরত খলীফাতুল মসীহ সানী (রা.)। তিনি এ লক্ষ্যে অনেক চেষ্টা করেন। তখন এখানে লন্ডনে ইমাম ছিলেন মওলানা আব্দুর রহীম দর্দ সাহেব। তার মাধ্যমে ভারতীয় রাজনীতিতে ফিরে আসার জন্য কায়েদে আযমের উপর চাপ দেন খলীফাতুল মসীহ সানী (রা.)। অনেক চেষ্টার পর দর্দ সাহেব তাকে বুঝাতে সক্ষম হন। স্বয়ং কায়েদে আযম বলেছেন,

‘ইমাম সাহেবের প্রেরণা, জোরালো নসিহতের পর আমার জন্য তা প্রত্যাখ্যানের আর কোনো উপায় ছিল না’।

একজন অ-আহ্মদী ঐতিহাসিক ও সাংবাদিক জনাব মীম শীন সাহেবও লিখেছেন,

‘জনাব লিয়াকত আলী খান এবং লন্ডনের ইমাম মওলানা আব্দুর রহীম দর্দ সাহেবের একান্ত প্রচেষ্টাই জনাব মোহাম্মদ আলী জিন্নাহকে স্বীয় সংকল্প পরিবর্তন এবং স্বদেশ প্রত্যাবর্তন করে জাতীয় রাজনীতিতে গুরুত্বপূর্ণ ভূমিকা রাখতে সম্মত করে। এর ফলে জনাব জিন্নাহ ১৯৩৪ সনে ভারতে ফিরে আসেন এবং কেন্দ্রীয় সংসদ নির্বাচনে বিনা প্রতিদ্বন্দ্বিতায় নির্বাচিত হন।’

(পাকিস্তান টাইমস: ১১ সেপ্টেম্বর, ১৯৮১- সাপ্লিমেন্ট: ১১ নম্বর: ১; ‘তা’মীরে তরক্কী পাকিস্তান এবং জামাতে আহ্মদীয়া’, পৃ: ১০)

হুযূর বলেন, এই স্বাধীন দেশ যার যার নাম পাকিস্তান রাখা হয়েছে; এ জন্য হযরত খলীফাতুল মসীহ সানী (রা.) এবং তাঁর নির্দেশে জামাতের সদস্যরা যে সংগ্রাম করেছে তার দু’একটি দৃষ্টান্ত আমি আপনাদের সম্মুখে তুলে ধরেছি। ইতিহাস চিরকাল এ সাক্ষ্য প্রদান করবে, আহ্মদীয়া খিলাফতই জামাতের সদস্যদের আধ্যাত্মিক, জাগতিক এবং নৈতিক উন্নতির পাশাপাশি মুসলিম উম্মতের জন্যও সময়ের চাহিদা মোতাবেক গুরুত্বপূর্ণ ভূমিকা রাখছে। তা কাশ্মীরীদের স্বাধীনতা সংগ্রাম হোক বা ফিলিস্তিনিদের স্বাধীনতা আন্দোলনই হোক অথবা উপমহাদেশের হিন্দু-মুসলমানদের অধিকার সংক্রান্ত বিষয়ই হোক না কেন; জামাতে আহ্মদীয়ার ইতিহাস এ কথার সাক্ষী যে, সর্বদা মুসলমানদের অধিকার আদায়ের আন্দোলনে জামাতে আহ্মদীয়া প্রথম সারিতে ছিল। এর বিপরীতে মৌলভীরা কী ভূমিকা রেখেছে? এরা দাবি করে যে, পাকিস্তান আমাদের! আমাদের চেষ্ঠাতেই পাকিস্তান সৃষ্টি হয়েছে। এদের বিবৃতি পড়ুন। এটিও তদন্ত কমিশনের রিপোর্ট। এতে আহ্রারী আন্দোলনের নেতা আতাউল্লাহ শাহ বোখারীর বরাতে লেখা হয়েছে:

‘এখন পর্যন্ত কোনো মা এমন সন্তানের জন্ম দেয় নি যে পাকিস্তানের ‘প’ও বানাতে পারে।’

তারপর এই রিপোর্টেই লেখা হয়েছে।

‘ফাসাদ বা বিশৃঙ্খলার সময় আহ্রারী নেতা, আমীরে শরিয়ত সৈয়দ আতাউল্লাহ শাহ বোখারী লাহোরে যেসব বক্তৃতা করেন তার একটিতে তিনি বলেন, ‘পাকিস্তান এক বাজারী নারী (বেশ্যা), আহ্রারীর বাধ্য হয়ে একে কবুল করেছে।’ ইম্নালিল্লাহ। (রিপোর্ট তাহকিকাতী আদালত, পৃ: ৩৯৮, নব সংস্করণ)

আবার রিপোর্টে লেখা হয়, এটি স্বয়ং শাহ সাহেবের বিবৃতি,

‘যারা মুসলিম লীগকে ভোট দিবে তারা শূকর এবং শূকর ভক্ষণকারী।’

(বয়ান আতাউল্লাহ শাহ বোখারী, ‘চমনিস্তান’- মওলানা জাফর আলী খান, পৃষ্ঠা: ১৬৫, ১৯৪৪ সনে প্রকাশিত; ‘তা’মীরে তরক্কী পাকিস্তান’- প্রফেসর নসরুল্লাহ রাজা, পৃষ্ঠা: ১৩)

এরপর তাহকিকাতী আদালতের রিপোর্টে লেখা হয়েছে:

‘১৯৪০ সনের ৩ মার্চ দিল্লিতে আহ্রারী আন্দোলনের কার্যকরী পরিষদের একটি সভা অনুষ্ঠিত হয়। এই সভায় একটি রেজুলেশন পাশ করা হয়, যাতে পাকিস্তান প্রতিষ্ঠার আন্দোলনকে ঘৃণ্য আখ্যা দেয়া হয়েছে। পরবর্তীতে কতক আহ্রারী নেতা তাদের বক্তব্যে পাকিস্তানকে ‘পলিদিস্তান’ (নোংরাদেশ) বলেও আখ্যায়িত করেছে।’ (রিপোর্ট তাহকিকাতী আদালত, পৃ: ২৮, নব সংস্করণ)

তদন্ত কমিশনের আরেকটি রিপোর্টে লেখা হয়েছে:

‘পাকিস্তান সম্পর্কে মুসলিম লীগের দৃষ্টিভঙ্গির প্রকাশ্য বিরোধী ছিল জামাত (জামাতে ইসলামী)। পাকিস্তান প্রতিষ্ঠার পর থেকে একে ‘নাপাকিস্তান’ বলে স্মরণ করা হয় আর তখন থেকেই এই জামাত বর্তমান সরকার এবং এর পরিচালনাকারীদের বিরোধিতা করে আসছে। জামাতের যেসব লেখা আমাদের সম্মুখে পেশ করা হয়েছে তার মধ্যে একটিও এমন নেই যাতে পাকিস্তান আন্দোলনের পক্ষে দূরতম কোনো ইঙ্গিতও পাওয়া যায়। বরং এর বিপরীতে এসব লেখায় বহু সম্ভাব্য ধারণা অন্তর্ভুক্ত

রয়েছে যা শতভাগ সে অবস্থার বিরোধী, যে পরিস্থিতির মাঝে পাকিস্তান জন্ম নিয়েছে এবং আজও পাকিস্তান যে পরিস্থিতিতে নিমজ্জিত।’ (রিপোর্ট তাহকিকাতী আদালত, পৃ: ৩৭৮, নব সংস্করণ)

স্বয়ং মওদুদী সাহেবের একটি বিবৃতি হচ্ছে:

‘যারা এই ধারণা রাখে যে, মুসলমান অধ্যুষিত অঞ্চল থেকে হিন্দু অধ্যুষিত অঞ্চল যদি পৃথক হয়ে যায় আর এখানে গণতান্ত্রিক ব্যবস্থাপনা প্রতিষ্ঠিত হয় তাহলে এখানে ঐশী ব্যবস্থাপনা প্রতিষ্ঠিত হবে, এটি তাদের ভুল ধারণা। প্রকৃতপক্ষে এর মাধ্যমে যা অর্জিত হবে তা কেবলমাত্র মুসলমানদের কাফির সরকার হবে। এর নাম ঐশী ব্যবস্থাপনা আখ্যায়িত করা সেই পবিত্র নামকে অসম্মান করার নামান্তর।’

(সিয়াসী কাশমাকাশ, পৃ: ১১৭, ৩য় খণ্ড- ১ম সংস্করণ; জামাতে ইসলামী কা মাদী আওর হাল, পৃ: ২৯-৩২)

এরপর ছয় বলেন, ১৯৪৭ সনে আইন পরিষদীয় সংসদে প্রেসিডেন্টের ভাষণে কয়েদে আযম কী বলেছিলেন তা দেখুন আর ১৯৭৪ এ পাকিস্তানের সংসদ কী সিদ্ধান্ত করেছিল তাও দেখুন। কয়েদে আযম বলেছিলেন,

যদি পাকিস্তানরূপী এই মহান দেশকে সমৃদ্ধশালী করতে হয় তাহলে আমাদের পুরো মনোযোগ নিবদ্ধ করতে হবে মানুষের উন্নতি ও অগ্রগতির প্রতি; বিশেষভাবে সর্বসাধারণ এবং দরিদ্র মানবগোষ্ঠীর প্রতি। যদি আপনারা সহযোগিতা ও অংশীদারিত্বের প্রেরণা নিয়ে কাজ করেন তাহলে অতি অল্প সময়ের মধ্যেই সংখ্যাগরিষ্ঠতা এবং সংখ্যালঘিষ্ঠতা, আঞ্চলিকতা, দলাদলি ও অন্যান্য একপেশে মনোভাব দূর হয়ে যাবে।

তিনি আরো বলেন,

আমাদের দেশটি বৈষম্যমুক্ত দেশ হিসেবে প্রতিষ্ঠা পাচ্ছে। এখানে এক ফিরকার সাথে অপর ফিরকার কোনো পার্থক্য থাকবে না। এখানে বংশ ও ধর্মের ভেতর কোনোরূপ বিভেদ থাকবে না। আমরা এই মৌলনীতির আলোকে কাজ আরম্ভ করছি, আমরা এক দেশের নাগরিক এবং এখানে সবার সম-অধিকার থাকবে।

আপনি স্বাধীন। আপনি আপনার মন্দিরে যাওয়ার বেলায় স্বাধীন। আপনি আপনার মসজিদে যাওয়া অথবা পাকিস্তানের সীমারেখার ভেতর যে কোনো উপাসনালয়ে যাওয়ার ক্ষেত্রেও স্বাধীন। যে কোনো ধর্ম, বিশ্বাস অথবা জাতির সাথেই আপনি সম্পর্ক রাখুন না কেন তা নিয়ে রাষ্ট্রের কোনো মাথা ব্যথা নেই।

কয়েদে আযম বলছেন,

আমার মতে, এই বিষয়টি আমাদেরকে লক্ষ্য হিসেবে দৃষ্টিতে রাখতে হবে এবং আপনি দেখবেন সময়ের সাথে সাথে, হিন্দু আর হিন্দু থাকবে না আর মুসলমান মুসলমান থাকবে না; এটি ধর্মীয় দৃষ্টিকোন থেকে নয় বরং রাজনৈতিক দৃষ্টিকোন থেকে বলছি। কেননা, প্রত্যেকের ব্যক্তিগত বিশ্বাস রয়েছে। এই দেশের একজন নাগরিক হিসেবে বলছি।

(আফকারে কয়েদ এ আযম (রহ.), পৃ: ৩৫৮, মাহমুদ আহেম কর্তৃক প্রকাশিত)

কয়েদে আযম এই ধারণা উপস্থাপন করেছেন অথচ ১৯৭৪-এর সংসদ সম্পূর্ণভাবে এর বিপরীত কাজ করেছে। রাষ্ট্র পরিচালনার জন্য পাকিস্তানের প্রতিষ্ঠাতা এবং সাংসদদের এই ছিল কাজ ও দায়িত্ব। যেভাবে আমি বলেছি, কারো ধর্ম, বিশ্বাস এবং ইবাদতের রীতি-পদ্ধতি নিরূপণ করা কোনো সংসদের কাজ নয়। যেদিন পাকিস্তান সরকার কয়েদে আযম নির্দেশিত মৌলনীতি অনুধাবন করে কাজ করবে সেদিন পাকিস্তানের উন্নতি ও অগ্রগতি নতুন পথের দিশা পাবে, ইনশাআল্লাহ তা’লা। ফিরকাবাজী এবং জাতিগত ভেদাভেদের দেয়াল ভেঙ্গে যাবে। তখনই পাকিস্তানীরা কয়েদে আযমের সমৃদ্ধ পাকিস্তান দেখবে। এখন রাজনীতিবিদদেরকে নিজেদের ইতিহাস থেকে শিক্ষা গ্রহণ করতে হবে। কারো ধর্ম বিশ্বাসের খুঁটিনাটি সম্পর্কে নিজের মত চাপানো

বা কারো ধর্ম নিরূপণ করা এবং নিজেদের বিশ্বাস চাপিয়ে দেয়ার অনুমতি ইসলামও কাউকে প্রদান করে না আর সেই মহান ব্যক্তি যিনি মুসলমানদেরকে একটি পৃথক দেশ বানিয়ে দিয়েছেন তিনিও এই অনুমতি দেননি। একজন নাগরিক হিসেবে পাকিস্তানের প্রত্যেক নাগরিককে প্রাপ্য অধিকার প্রদান করা আবশ্যিক। ভোটের অধিকার, চাকুরির অধিকার, ধর্ম ও বিশ্বাসের অধিকার, এগুলো তার প্রাপ্য-তাই তাকে দেয়া হোক। আইন কার্যকর করার যতোটা সম্পর্ক; তা সবার জন্য সমান হওয়া উচিত এবং তা প্রয়োগ করা উচিত। সম-অধিকার পেলেই দেশে শান্তির পরিবেশ ফিরে আসবে। শাসকদের উচিত এর থেকে শিক্ষা নেয়া, ১৯৭৪-এ যে সিদ্ধান্ত হয় এরপর ১৯৮৪-তে এতে আরো পরিবর্ধন এনে আহ্মদীদের বিরুদ্ধে যে কঠোর ব্যবস্থা নেয়া হয়, যে বিধি-নিষেধ আরোপ করা হয় এরপর থেকেই মূলত দেশ অধঃপতনের দিকে ধেয়ে যাচ্ছে। কোনো উন্নতি দেখা যায় না। এক পা এগোলে তিন পা পিছিয়ে যায়। সব ধরনের যুলুম-নির্যাতন সত্ত্বেও দেশের মঙ্গলের জন্য আহ্মদীদের চেষ্টা ও দোয়া করা উচিত এবং তারা করবে। কিন্তু আহ্মদীদের ক্ষতি যারা করছে তাদের যেন স্মরণ থাকে, খোদার নিয়তি একদিন অবশ্যই তোমাদের কাছ থেকে প্রতিশোধ নিবে। প্রতিনিয়ত ইসলাম ও আইনের মারপ্যাচে আহ্মদীদের যে শহীদ করা হচ্ছে। এই রক্ত কখনও বৃথা যাবে না। আল্লাহ তা'লার এ উক্তি সর্বদা স্মরণ রাখো! বলা হয়েছে,

وَمَنْ يَقْتُلْ مُؤْمِنًا مُتَعَمِّدًا فَجَزَاؤُهُ جَهَنَّمُ خَالِدًا فِيهَا وَغَضِبَ اللَّهُ عَلَيْهِ وَلَعَنَهُ وَأَعَدَّ لَهُ

عَذَابًا عَظِيمًا

অর্থ: এবং কেউ ইচ্ছাকৃতভাবে কোনো মু'মিনকে হত্যা করলে তার প্রতিফল হবে জাহান্নাম, যাতে সে বসবাস করতে থাকবে। এবং আল্লাহ তার প্রতি ক্রোধ বর্ষণ করবেন এবং তিনি তাকে অভিসম্পাত করবেন এবং তার জন্য মহা আযাব প্রস্তুত করবেন।' (সূরা আন নিসা: ৯৪)

সুতরাং আল্লাহর শাস্তিকে ভয় করো।

এরপর ছয় বেলন, সম্প্রতী আবার অত্যন্ত পাশবিকভাবে এক যুগল যুবক-যুবতী স্বামী-স্ত্রীকে মূলতানে হত্যা করা হয়েছে, শহীদ করা হয়েছে এবং তাদের কেবল এটাই দোষ ছিল যে, তারা যুগ ইমামকে গ্রহণ করেছে। উভয়েই ডাক্তার ছিলেন এবং সর্বজন প্রিয় ডাক্তার ছিলেন। তাদের একজন হলেন ডাক্তার সিরাজ, বয়স ছিল ৩৭ বৎসর। তাঁর স্ত্রী ডা. নওরীন সিরাজ, যার বয়স ছিল ২৮ বৎসর। আমার মনে হয়, মহিলা শহীদের মধ্যে তাঁর বয়স ছিল সবচেয়ে কম। নূন্যতম মানবতাবোধ যা এক মানবহৃদয়ে থেকে থাকে তাও এদের মধ্যে নেই। যারা মানুষের জন্য কল্যাণকর সত্তা, মানুষের সেবা করেন, মানবসেবা করেন এবং তোমাদের রোগীদের সেবা করছেন তাঁদেরও এমন পাশবিকভাবে হত্যা করলে! এ সকল বিরোধীদের স্মরণ থাকে যে, আহ্মদীরা মহান উদ্দেশ্যে শহীদ হচ্ছেন। মহানবী (সা.)-এর নিষ্ঠাবান দাসের আগমনে যে সত্য প্রকাশ পেয়েছে তা অস্বীকারের কারণে দেশে যে বিশৃংখলা ছড়াচ্ছে অনেক নিষ্পাপ মানুষকে বিনা কারণে হত্যা করা হচ্ছে, এটাও প্রকৃতির প্রতিশোধ।

এরপর ছয় শহীদ দম্পতির বিস্তারিত বিবরণ তুলে ধরেন এবং নামাযান্তে তাদের গায়েবানা জানাযার নামায পড়ান। আল্লাহ তা'লা জান্নাতে শহীদদের পদমর্যাদা উন্নীত করুন, আমীন।

(প্রাপ্ত সূত্র: কেন্দ্রীয় বাংলা ডেস্ক, লন্ডন)